

四庫全書

集部

欽定四庫全書

集部
敬業堂詩集卷四十

詳校官左中允臣璿五珠

助教臣常循覆勘

總校官庶吉士臣倉聖脉

校對官中書臣雷純

謄錄監生臣莫與儔

欽定四庫全書

敬業堂詩集卷四十

翰林院編修查慎行撰

長告集

起壬辰正月
盡十二月

辛卯臘月左手病風今春漸及右臂蒙

恩停免內直始得因病乞假前後滿百日患猶未除適
兩院長俱遠出遂因循度歲昔白香山守蘓州時
年甫五十八而退居之計已決其詩有長告雖當

百日滿故鄉元約一年回之句未幾果歸又十年而風疾作余今年六十有三患病在前請假在後出處之際有媿昔賢多矣

元旦朝回

御賜酒肴果品二席中使賫至臣家感

恩恭紀

玉笋班初散瓊筵

賜北扉忽傳

中使到正值早朝歸仙液瓜梨脆

哈密瓜凍梨皆異品也

春羹雉

兔肥一家同醉飽元日拜

恩稀

周桐野前輩貽雲碁一副開奩皆白子也戲占

二絕句

朝來畫得紙為枰一笑開奩賭不成遮莫先生寓微諷
不教黑白太分明

周天三百六十一奇偶中從太極分細玩君家舊圖說

有陽可得獨無陰

病風

香山臨老愁風痺
昭諫多時患臂寧
自分早衰宜速退
敢云同病比前賢
三災有劫誰能免
五苦無塵可怕纏
不學維摩佯示疾
道場還作散花天

瀆山酒海歌

并序

內西華門外西南一里許
明朝御用監在焉
又南數十步為真武殿
庭前老檜一株
下有元時玉酒海承

以石床玉色青碧間以黑章白暈旁刻魚龍海馬出
沒波濤之狀口面約廣三尺餘隨其質為凹凸若荷
葉然形製朴古膚理溫潤中容四五石許壬辰正月
十九日偕雲間高不騫槎客往觀摩挲久之按元史
世祖紀至元二年十二月瀆山大玉海成勅置廣寒
殿輟耕錄云廣寒殿在萬歲山頂中有小玉殿內設
御榻左右列侍臣坐牀前架黑玉酒壺一車駕歲巡
上都先宴于此燕都遊覽志云今御用監中有小亭

亭內一玉缸體質頗潤中積水外以朱欄護之即廣
寒殿中物也槎客屬予紀其實因參考舊聞而系以
詩

雲間高生精賞鑒嗜古搜竒確且瞻朝來道子我出西華
指點前朝御用監監南新瓶立都壇當門老檜青蛟蟠
舊聞酒海今落此共嘆體質猶堅完瀆山巨璞初無價
誰遣不脛來輦下至元巧匠雕琢成萬歲山頭設高架
天然位置平不頗瑣窗八面開重阿石龍吸水上霄漢

倒瀉溢為太液波波光翻動廣寒殿滿窺蒲桃映華瑱

侍臣多著質孫衣

質孫燕服見元史世祖紀

天子親臨詐馬宴電轉

星流四百年故都何物不推遷曾承沆瀣依天上流落
人間亦可憐亭虛無復朱欄護頽砌旁連髹器庫天吳
跋浪鬣鬣張只與空庭飽風露君不見周彝商斝近來
無形製爭傳博古圖為池為海將安用笑爾幾同五石

壺

恭和

御製咏鳥槍原韻

鍍金浴鐵製新傳萬丈光生掌握前
命中巧踰弓入彀發機突並鳥爭先
毛風血雨來千里電暉雷礮徹九天
一震餘威收有截坐令寰宇靖烽煙

正月二十五日奉

旨停免內直仍赴翰林院供職恭紀

九年眊筆廁清班忝竊虛名祇汗顏
瑣闥乍辭疑削籍玉堂重到許投閒
勞生分定升沈外

聖主恩深進退間，留取羽毛憐病鶴。
孤飛何日放教還。
二月朔日碧桃盛開

無數緋桃蕊齊開，仲月初人情方最賞。
花意已無餘

初假十四韻

涉海疑無岸，收帆喜有涯。
初諳閒氣味，已攬病情懷。
長假知難遽，微名料易埋。
密藏虛白室，高挂踏青鞋。
一榻春將半，孤踪世孰偕。
自延醫入座，便少客升階。
似鵠肩雙塌，如籤指互排。
屈伸寧自主，運用漸多乖。
藥餌聊投

水針銚等刺柴蘭編從度閣典校免科差卧久兼拋杖
僧來或勸齋老蠶甘蠹葉瘦馬嗜枯蕪即事安愚分餘
生戀癢骸幾時真大笑撒手向懸崖

盆中新種幽蘭忽吐一花病枕喜作十二韻

本草繙因藥旬來偶種蘭近根微取潤培土最宜乾愛
護新芽茁爬梳舊葉完連朝風習習昨夜露溥溥笑口
欣將拆花頭側未安一尖長計寸五出瓣成單靜女晨
粧淡幽人翠袖寒香來殊不意夢好却無端客有逢知

賦周弘讓山蘭賦
竊達知于綺季

吾方擬搯彈當門誰免忌入室雅相

驩養鼻芬何與

椒蘭芬莖所以養鼻也出史記禮書

同心契漸難祗應賢

子弟佳氣滿門闌

時德尹潤木信安諸弟俱在都下

元立上人淮陰張氏子幼隨父客京師父歿權

厝天津且死屬其子曰必反吾骨故鄉時元立

甫九歲貧不能自存去而為僧得法于平陽晝

公今五十年矣辛卯秋徒跣北來求父葬處天

津瀕海沙水衝激殆不可辨有里老張姓者依

稀指其處發視墓碑在焉桐棺無恙將奉以歸
莫相見京師乞一言紀其事爰贈以詩

僧臘五十八當時九歲孤悽涼銜治命辛苦望泉壚鬼
守他鄉魄兒存出世軀兩消生死憾含笑赴歸途

獨坐聞孤雁

風急天高片影孤水圍初脫尚驚呼

是日行在孤將幸
初撒水圍

有單棲處莫入羣中更作奴

清明日偕馮卯君馬素村沈駟襄家言思諸孝

廉及兒建出右安門小飲祖園水亭有懷城西
舊遊

卧聞風日好暫起出郊坵歲有清明節人如聚散星烟
光初上柳水氣欲生萍却憶名園路橋邊共踏青

三月十五日

恩賜翰林院講讀編檢諸臣松花江綠石硯中使宣

旨查慎行吳廷楨廖賡謨宋至吳士玉五人向在武英
殿纂修着揀式樣佳者給與臣慎行得夔龍大

硯一方恭紀二十韻

砥石青山麓松花碧水濱天文聯析木地產富琳珉
蘊作巖間璞來為席上珍自蒙官采擇頓發玉精神
有用逢時出無瑕抱質純性剛偏漱潤膚膩不留塵
露氣鮮流葉波光綠漾蘋銘辭周雅古

背有御書銘其辭曰以靜為用是以永年

形製帝鴻新規矩方圓合廉隅節角勻雕龍由哲匠
篋鳳賁儒臣

賜硯有泥金漆匣

憶昨隨班久曾經拜

賜頻

前在蒙

內廷兩頒賜

諭麋兼月給棊几亦時陳延閣披

香夕山莊珥筆晨詩多呈

乙覽賦每達

楓宸自罷文昌直仍叨竊祿因微勞蒙

記憶末路慰沈淪

優旨宣中使殊榮逮五人枯魚咸仰澤病樹稍知春臣
分增慙慙

君恩視笑嚔捧歸憐手顫增重為

絲綸

曉出西郊

小童晨出郭歸報杏花開
病試經春屐隣賒過臘醅斜
風吹巷陌細雨隔樓臺
未遂田園計僧寮又一來

偕德尹潤木信安兒建孫
祈過摩訶菴看杏花
主僧乞詩留題一絕

酒場詩壘付前塵不到精藍
二十春今日眼昏花似霧
僧雛誰識未歸人

再疊韻一首

弟勸兄酬不隔旬
花前渾作一家春
可能消得兒孫福
奉杖將車侍老人

廣濟寺看海棠同涂變菴徐壇長次杜牧之街

西詩韻

滿城烟柳正藏鴉
好事偕尋老衲家
幡影愛飄新掃地
露痕初綻半開花
畧宜步障遮濃日
惜少鳴夷載後車
有似旁人苦攀折
一枝歸插帽簷斜

是日再過變菴同年寓園看海棠兼招王樓村

笑口重開又一奇小堂南北萬花枝同時被賞寧論晚
明日來看定悔遲無雨劇憐如許艷有風生怕不禁吹
惟應火急邀詩老趁取嫣紅撲酒卮

荷陰清暑圖揆院長屬賦四首

綠水亭南萬綠楊一奩明鏡貯煙光自移玉井如船藕
高放花頭盡出牆

碧雲擎蓋午陰涼不獨花香葉亦香想見公門清似水
春耒飛近讀書牀

六月遊人汗汁融透肌一陣好涼風欲知魚樂看魚戲
長在田田翠影中

比似濂溪愛有加年年貪看畫中花直從葉點青錢後

剝過蓮蓬始到家

先生每歲扈
從避暑故云

送陳絨菴前輩視學山東二首

頻年慎簡出宮坊公道能令士氣昌稽古榮歸儒者分
掄才難得聖人鄉機絲合與金針度分判知從玉尺量
館閣同時皆屬目又看魁柄指東方

冰壺貯質雪飛丸清望今猶重此官絳幄風開三月後
紫躔光動五雲端蓬瀛盛事推枌社桃李新陰到杏壇
此去畿南纔七驛道旁迎謁盡儒冠

辰假戲簡吳山掄薄聿修陳世南三同年

俸滿開坊及慵多請假頻雨中三月暮花外五湖春已
遠鷓鴣隊猶羈麋鹿身好官如歲酒推讓少年人

德尹招同人飲寓庭紫藤花下

此藤此地初種時詩翁酌我索我詩

藤為桐野手植者
今日周亦在座

藤今成陰花滿架吾弟重來宅其下夜來急雨雷聞聞
拓窗起看東南天雲頭解駁日穿漏紫氣散作濛濛煙
兩龍上走尾倒懸之而鱗爪紛盤旋佛光中現寶瓔珞
絳節珠幢朝曉仙笑渠主人負花癖治具典衣誇示客
酒徒一半招不來來者留連窮日夕高燒紅燭臨前庭
燭燄浮動十娉婷忽然落葉墮杯面香入醉魂愁欲醒
十年萬事經眼見况此旅寓如郵亭藤兮得氣漸張王
而我與汝俱頽齡閒坊大可養衰疾官守幸已逃拘囹

飲雖小戶且滿引莫待鳥啄花飄零

陳子萬七十壽令子履中孝廉來乞詩

曾於郎署挹清風解組歸成鶴髮翁才子聲名喧輦下

故交書札到山中荆溪花萼排家集

子萬與令兄其年
緯雲合荆家集

商洛烟霞屬寓公

時子萬移
家中州

知足林泉能養壽自慙宦

跡尚如蓬

題汪顓三騎驢圖即送其赴醴泉縣任二首

結束翩翩西入秦也如懷縣著安仁杏園別有騎驢者

羨爾幾同鶴背人

今科進士俱留京教習不聽還鄉唐時進士皆騎驢故云

逸足曾登郭隗臺屈他作吏亦仙才三峯圖上逍遙意

又看昭陵石馬來

昭陵在醴泉管內

同年王樓村嘗夢至一處梅花滿庭有一老人杖而入以杖數樹云此十三本以付汝汝若饑時但喫梅花便是神仙地位也覺而屬禹司賓慎齋畫十三本梅花書屋圖壬辰四月樓村官罷將出都以圖索句作歌贈之

鴻臚禹子特好竒聞人說夢乃畫之寒梅繞屋十三本
一一着花無醜枝問渠此屋在何許異境云自華胥移
龐眉丈人野鶴姿指樹付汝汝不辭嚼花可使食無肉
仙者得之能療饑覺來官舍冰雪冷滿牀簌簌香風吹
君家汜光湖水湄柳絮繁梅少地苦卑買栽開徑良不易
梅性故與高寒宜然而畫藁出神授何必遠問孤山為
但愁書多無屋貯莫歎樹小看花遲浮生所遇率假合
剎那劫比阿僧祇幻中生幻想非想身外有身知不知

君今罷官歸有期
遽遽形開夢者誰
詩成擲筆吾自哂
區區紀夢何其痴

因病展假院長揆公遣車邀至郊園用義山詩
作起句

潼濱卧疾正無憊
忽枉車音荷見招
藥草去扶藜杖覓
楊花來傍酒旗飄
不緣別夢三春隔
已憚勞薪半日遙
重到名園知有分
為憐詩癖未全消

院長和前韻謂余將乞長假特寓留行之意再

疊韻奉答

出處心孤不自膠，當歸何待故人招。
花隨流水雖難住，絮到粘泥已倦飄。
塞馬楚弓紛得失，遊鷗斥鷃各逍遙。
獨餘門館酬恩地，香山詩高家門館未酬恩結作癡癩未易消。

自怡園藤花

朱藤春季花入夏，已狼籍名園開較晚。
間作一旬隔我來，若相待耀眼動魂魄。
舉頭千萬稍稍上，高格迴欄三百步步轉。
幽蹟中休得小亭未覺方，丈窄花穠四

垂髻葉厚平展席輕如榆穿錢小串低可摘重如鯁貫
柳繁縷紛難擘尾長或計尋莖短亦盈尺高褰俄作勢
密綴欲無隙南北交絲幃東西挂簾額采香蜂經營噉
影魚跳擲紫雲烘暖霽不受日光炙旦晚顏色殊陰晴
氣候易主人有深意名此閒吟客方當豁襟抱兼用佐
肴核擷之復湘之謂有噉花癖從公亦何幸醉飽且永
夕明歲花發時回頭莽陳迹

曉起聞鶯聲次院長原韻

煙條雨葉密難分
睨睨聲從隔岸聞
自出喬林為求友
苦教獨客感離羣
暗穿花徑如流水
暖炙笙簧好遏雲
斗酒雙柑真不厭
為渠晨坐到斜曛

雨後觀芍藥再呈院長

夜來微雨曉來風
多為階前芍藥叢
艷色可將何物比
賞心聊與故人同
遲開分落羣芳後
獨秀慚居萬綠中
莫以將離煩折贈

兩年以來園中每有
花開公必遣人折送

此花不稱白鬕

翁

鶴卵次院長原韻

四生一墮想緣深
陽鳥雙棲只在陰
遺種也憐同羽族
托胎誰信有仙禽
雲霄已具初生質
渾沌猶全未鑿心
他日長鳴聽子和
勿將雀鷲比淳音

蕪明允詩雀鷲含淳音

聞汪紫滄同年出獄

忽傳

恩赦下蕭晨
病枕初疑聽果真
但是旁觀多感涕
誰當身被不沾巾
累朝豈少文章禍

聖主終全侍從臣莫怪兩家憂喜共十年同事分相親
送孫洪九之任瓊山兼簡瓊州守林碧山

異才資格外仕路有先機

洪九在武英書局校錄去冬告竣

特恩叙用

得邑

莫辭遠着鞭如爾稀嶺雲雙鳥度海島一颿飛
府主今賢者茲行得所依

平陽太守孔彞仲六十壽詩

十五年前識孔愉座中曾示武夷圖

戊寅初夏余遊武夷時彞仲宰崇安

家承曲阜先師學郡領陶唐古帝都
官况祇聞琴配鶴

仙山猶憶鳥為鳧懸知北海開樽處酒釀蒲桃不用沽
賦得忍冬花送樓村同年南歸分韻得羣字

鴛鴦亦有偶鷺絲亦有羣

本草忍冬一名鴛鴦藤一名鷺絲藤

豈謂閱晨

莫遽看黃白分亭亭羞獨艷兩兩含清芬願保忍冬意
嗒馬吟送君

以釋門五經約註送院長有詩見謝即次來韻
奉酬

禪宗空諸無梵夾寶諸有光同日月照瑞叶龜龍負新

舊譯兩伊一豈殊三九

翻譯名義云西方有新舊兩伊猶此土之篆隸又云開雖具九

九只是三三九雖殊其理常一

五經大綱具五藏條目剖三十八萬言

言言垂不朽

大論云毘勒藏有三百二十萬言佛在世時所造後人憶誦力少不能廣誦撰為三

十八萬四千言

聲明先釋詁

大論言五明者一曰聲明釋詁訓字詮目流別

精理發智

母起教阿含先修行木义首明通徹墻壁解脫除枷杻

散華與貫華慧悟非愚守多羅雖布葉漚鉢必尋藕我

無廣誦力心地未離垢自從獲此書煩惱變蜆斗久知

繆緘石猥欲珍享帚狂緣稍稍歇幸免怖頭走方丈寄

一軀由旬視四肘有時或展閱默坐牢閉口先生愛我
深采善每勦醜作詩相扣擊現此霹靂手祕笈敢自藏
琅函往无咎願公調五味灌頂孰與偶眼界示空澄微
塵悉抖擻琉璃無障礙當見山河否

送史倣弦前輩視學粵東二首

去作蓬瀛海上仙文昌八座本同躔一朝掌制推三世
萬里持衡在兩年

史典雲南鄉
試初回故云

蜃氣晴標瞻斗地虹光

夜發種珠淵蒼榕錦荔成陰徧桃李春風分外妍

鳳池重望屬宮端
新見丹山振羽翰
昨捧

紫綸千騎出

尊甫儲相前奉

命於三年祭告南海

新開絳帳萬人看
班

香宋艷才相
嬪蘓海韓潮
量校寬但是
同朝誰不羨
文章早達似
君難

晚香齋畫卷紅椒上人屬題二首

清流九派滙東湖
湖上精藍傍弄珠
三十年前遊似夢

黃花應笑白髭須

癸亥客遊當湖始識上人于化城菴

晚香齋畫已流傳
初白菴成未有緣
世出世間留二老

把茅至竟讓誰先

羅浮五色蝶院長屬賦

我愛羅浮雙鳳子碧紗籠出看分明別從花底留仙種
不向林間鬪化生莊叟夢中渾未識滕王圖上總難名
祇疑園客蠶為繭五色抽絲繡得成

送院長揆公隨

駕避暑山莊

上卿侍從有仙才

詔許攜家避暑來閒裏未妨披卷過別前先約寄詩回
灤魚味入三秋美塞草花多六月開曾是往年同直地
萬峯回首隔蓬萊

把犁圖為汪苻洲前輩題二首

宛轉橋通曲折溪綠陰南北岸東西玉堂不少栽花地
為愛山村雨一犁

身占蓬池第一流却從跨鳳想騎牛山中宰相他年事

不要黃金畫絡頭

用南史陶弘
景傳中事

題從孫恒侯雲岫觀日出圖

雲岫家門山去家咫尺耳平生趾未到浪走千萬里客
中看畫興飛騰老矣梯空力尚能桑榆欲挽扶桑景歸
作鷹窠頂上僧

送陳鍾庭前輩由學士督學畿輔二首

旁無汲引上丹墀獨以文章結

主知奉使銜仍兼學士持衡公不愧宗師朱衣院吏傳
呼出白髮儒官載筆隨好是年時車馬道兩行桃柳夾

旌旗

春風入座藹然披，形跡無嫌自絕私。
花月有時成邂逅，壺觴幾處記追隨。
戢鱗魚尾騰蛟地，塌翼鷗眠浴鳳池。
未敢出郊同祖餞，聊憑折柳託新詩。

送唐次衣庶常省覲歸揚州次安溪相國原韻

紛紛冠蓋場，勇者乃先去。河橋萬株柳，攀折凡幾樹。

九重亟儲材，館選盛冷署。新進半登瀛，芸窗拓雲霧。
舊來冰雪文詮次，列州部羣推。著作手領袖，佇知顧云胡。

遽俶裝矯首赴歸路足知學問力祿養猶孺慕白華古
義存至潔如飲露天際望南帆花間指西墅人生屬有
願肯作蓬萍聚與君昨論交託契在未遇知我無若君
侵尋感末暮重來祇自悔余丁亥告假南歸
次夜有送行叙久滯真再
誤厚意久豈忘聊抒贈行句

湯西厓前輩自通政改授翰林掌院學士時奉
使嶺南未歸馳詩寄賀兼述鄙懷八首

卷注

恩深出入偏重看名籍冠羣仙文章舊價新增重不礙

來遲十二年

先生于庚辰春
由編修改諫垣

久推公望稔公才合到蓬山頂上來品秩不殊銜特換

北扉班壓大銀臺

同時領教得名臣程李欣傳拜

命新到此始知師席貴錦袍分占兩家春

明弘治中程
望墩與李西

涯有詩云詞林盛事久相仍師席逢君喜不勝今先生與少司空揆公奉旨亦同教習庶吉士故云

望中一髮海天青暫借文星作使星莫被江山久留滯

無邊風月在頭廳

唐翰林承旨所居第一閣亦名頭廳在學士上今之掌院即承旨職也

詞林故事聞前輩誥勅元須巨手裁便合還

朝稱閣老文淵內署待公開

舊傳文淵閣為翰林內署詔冊制誥皆屬焉凡宣召

文移止稱翰林院初不以內閣名每日與閣臣會食輪學士一人專掌誥勅多挨次入閣者故例稱閣老今燕州有閣老坊乃吳艸庵為學士時建

石渠天祿校書頻仍歲員多比積薪我是史官頭雪白

末班猶領百餘人

編檢俸深無過余者

敢擬微之並樂天才名官職兩殊懸只除一事差相似

恰比先生老七年

白香山詩自注云予老微之七年今余與先生年齒相去亦爾故得借用

此事

病中未奉休官檄枕上先成寄遠詩
計日乞歸應有分
向來心事荷深知

送同年宋山言視學兩浙

與君隣牆居晤言實踈曠
隔牆見高樹雙鵲巢其上
連朝傳好音奉使開絳帳
余方移疾卧君過問無恙握手
起踟躕慰懷釋惆悵
吾鄉十一郡山海饒氣象自昔不

乏才名賢出輩行讀書想前喆指授不流浪長老尊所
聞後生知所嚮家家承榘矱一一資蘊釀自從娶學哀
科舉變時尚姚江矯斯弊絕學揭孤倡傳習到南雷淵
源大流暢經經緯以史文筆兩浩蕩秀水未竹及慈溪

姜西溟

頡頏庶相伉爾來復誰繼耆老日凋喪畝畝任榛

蕪多士將安仰君生公相家儒雅世宗匠商聲振河岳
金石比清亮人稱詩滿囊自喜書壓摺此行執文枋獨
力狂瀾障梗柎豫章材厥初視乎養植根在績學條蔓

艾冗長風先絕奔趨名亦戒標榜轉移良易事勢捷登
高唱徒從制藝論於衆非所望吾今老且廢記誦月就
忘尚思炳燭光未肯頽然放平生婞直性語出常近謗
歸去作州民菰蘆倘相訪

院長自口外寄餉灤魚山蕨

山澤珍難二者兼灤魚肥美蕨芽甜銀絲斫鱸冰調水
錦帶宜羹雪點鹽私為飽餐慙過分頻叨遠餉恐傷廉
年來口腹真相累此疾從今也要砭

兒建舊任東鹿令自補部郎每生日邑之士民
不憚六百里走京師製屏幃為壽遇余誕辰亦
然無以酬之作詩以示不敢當之意

古有歌來莫人今屬去思不聞循吏傳兼補白華詩宦
蹟清殊愧民風厚可知年年四五月重甕到京師

百日假滿歸心未遂排悶成篇

乞歸無路且遲遲長告俄踰百日期已是膏肓成痼疾
非關藥石少良醫飛鳥將子於誰止

兒建先以病告老
假行有日矣

馬為駒只自唾轉覺

君恩難報稱俸錢三萬又虛糜

偶閱雪關訓和詩輒效其體作十偈寄晚香上

人

耶舍在孕七日和修處胎六年那論後先遲速各人自有生緣

造物為壚為炭衆生自灼自煎本來無垢無淨跳出湯泉冷泉

馬鳴廣造論議阿難修集多羅一字不圖遮眼試教燒
却如何

五百龍宮鶴衆他生盡是門徒切忌當頭着棒且須開
手還珠

業惑即迷即悟慧根何淺何深倚杖雖傷佛面投鍼便
契師心

塔上鈴鳴何語牆頭幡動誰家禁得毘藍風力除非一
角袈裟

一家眷屬何有木魅水怪山魃雖則門風高峻就中容
得波旬

法要不關衣鉢禪宗易雜龍蛇東方入世避世康樂在
家出家

童子燒香掃地厨人篩米搬柴此段作何消受老夫念
佛持齋

八萬四千偈子猛逢毒手多刪截斷口頭語句請師另
逗機關

久旱得雨

聽說今年旱南連兗豫愁遺蝻仍出地宿麥已無秋得
雨寧嫌晚如膏幸徧流黍苗多望澤莫但洒皇州

雨中院長送塞山赤藤杖至兼以詩索和次原
韻

孔光靈壽儼非倫冒雨猶煩送杖人倚賴扶持防滑路
料量筋力好抽身鳩知祝咽先濡味龍欲騰梭早濯鱗
不向街頭輕曳出撥開雲霧即狂塵

題徐壇長庶常竹趣圖

泉聲絕磻秋咽霜信空山早寒何物不當搖落此君獨
占檀欒畫中千個萬個賦裏三竿兩竿留取數間茅屋
從教日報平安

題陳希聖然藜圖

閒拋萬卷在巾箱多為官書校勘忙眼大如箕君莫怪
已將藜火比螢光

題達履中東郊尋梅圖

黃埃高壓城頭山老夫畏暑方掩關何來一幅好圖畫
彷彿置我羅浮間圖中之人貌冰雪格與苔枝兩清絕
從知托興在高寒不怕侵肌有炎熱因君棖觸動歸心
欲和孤山處士吟明年君放西湖棹但向梅花多處尋

夏水

一派方諸水來從石上流物無堅不化性有重還浮耐
冷誰能踏乘炎勢易酬夏蟲渾可語吾欲詰莊周

余歸志已決而行在信至院長固欲相留再呈

一律以申前請

世味酸鹹別歸心老病交寧忘魚在藻其奈鶴思巢古
有成人美吾非解客嘲願公全末路道在遯三爻

自怡園荷花四首

一片頗黎上下空芙蓉城現水精宮已離大地炎埃外
尚在諸天色相中未免情多絲宛轉為誰心苦竅玲瓏
雲烘日炙如相試賴是清涼不待風

雕闌北面小亭旁久坐真成透骨香翠羽拂奩開皎鏡

綠衣扶扇侍紅粧
繁華膏鬪春三月
淡蕩偏宜水一方
馬跡車輪尋不到
別依淨域作花王

菰蒲響雨午瀟瀟
盡洗胭脂取寂寥
一鷺偶依踈影立
雙魚忽破靜機跳
輕橈劃浪紅翻岸
高柳移陰碧過橋
宛在中央情脉脉
微波咫尺去人遙

菱角雞頭漸滿池
亭亭獨搜出塵姿
難留雨露珠頻瀉
自拔泥汙性不緇
老衲山中移漏處
佳人世外改粧時
白頭相對歸心切
欲捲江湖入小詩

長律一章寄祝座主清溪徐公九十壽

吳興自昔多耆舊人瑞今歸九十翁古殿靈光尊海內
歲星朗耀在江東龍門傳裏張丞相淇澳詩中衛武公
落落乾坤誰行輩明明朝野屬宗工韓歐著作作竒而正
顏謝篇章麗且雄細入管城抽虎僕健踰弩矢射牛螭
文壇地望高于位談吐光芒亘若虹白雪調孤卑郢曲
朱絲絃直叶廂桐主張聲氣能延攬領袖儒紳待發蒙
李泌藏書借諸葛蔡邕秘本得王充頌琴拂拭知黃鵠

老研摩挲辨帝鴻却對友朋心轉小愛聽絲竹耳逾聰
人稱恭謹成家法客許周旋合禮衷什襲有囊多錦製
留題無壁不紗籠徧栽桃杏開芳徑新茁芝蘭壓舊叢
雅量風清兼月白閒情澗碧與山紅陸龜蒙里移茶竈
張志和家續釣筒峯倚百寮如畫幃泉疏半月是清潔
居鄰崑閩差相亞道在神仙必可逢憶昨歲當京兆試
吾師力具大臣風如網獨挈收羅廣比鏡虛懸藻鑑融
拔茹心傾非黨援掄才典鉅本公忠肯教謗鼓清清濁

特荷

君恩見始終存問屢承

中旨渥晉階還校在朝隆壺漿出境迎十里几杖同時
授

兩宮已勅天厨供飲膳復頒

宸翰示褒崇衣冠盛事推華皓扶掖餘榮逮僕僮八洞
雲霞雙蠟屐五湖烟月片青蓬種魚蘋末看羣戲養鶴
松梢待上翀自信結胎從混沌寧煩訪道到崆峒千莖

雪變丹爐火百煉鋼銷赤堇銅下士口傳非要訣至人
踵息有深功蓋珠乍轉時三扣瓊液閒拋偶一中黃髮高
堂老宗伯黑頭子舍大司空抱來膝上皆文度呼出尊
前悉任重成器固知由哲匠學箕旋喜作良弓虞庠又
見孫曾入洛社稀聞橋梓同兩寺高僧招遠永五君新
咏削濤戎阮宗大小分南北裴度東西合耄种雨過離
根采黃菊霜餘渡口賞丹楓小春晴暖梅先報十月温
和水未凍

叶

屏展彩蟾金的皪杯浮綠蟻玉玲瓏遠從

翠島尋琅菜近向玄都覓綺葱
賤子受知非一日微官
托跡類孤蓬執經曾附三十士
筭歷俄周十二蟲常願
籃輿隨靖節敢云藥物備行冲
升沉分已安岐路進退
心惟撫薄躬寸簡迢遙馳北闕
辦香親切奉南豐秋來
準擬求長假歸去猶思效祝嵩
屈指稱觴期可剋門墻
雖峻往來通

寄祝梅定九徵君八十壽安溪相國屬和

數參河洛在先天絕學今猶見
一賢訪道早承

安溪相國見示紀家難述舊德詩敬題長律五

十二韻

相國勲猷盛旂常日月邊廟堂調鼎鼐寰宇靖氛煙却
自承平際追思開創年安溪城僻左瘴海地連綿劇盜
營三窟官軍敗兩甄縣疆騷永德郡界躡漳泉挺險猿
猱捷潛蹤蜂蠆懸最難防出沒多是困述遭村落胥波
蕩深山亦蔓延公家時避匿叔姪被拘孥弱肉疇能保
強宗孰與聯間闕歸仲父急難見英賢虎口危將探鷄

原痛莫湔試憑三寸舌行挾一空券本擬辭相奪終知
怙不悛脫身思變計除惡要兵權豈有田橫客俄揚祖
逖鞭一呼童僕應兩志弟昆堅買劍招莊戶椎牛出牧
田誓詞情款款義憤涕漣漣首以身衝賊誠堪十當千
拔弧惟恐後集矢共爭先是夜昏迷路其時霧塞天彼
愚驕恃衆我怒勇躋顛岩谷聲搖動風雲氣接連夢魂
兇膽裂頭尾亂屍填鼠穴還深鬪烏巢又繼燃曳柴妻
子棄委壑糗糒捐牙藥俱殲矣根株務拔焉向來投死

地何敢冀生還失喜經年陷仍看十口全親朋篩酒會
官長插花筵赴敵雖倉卒成功詎偶然衣冠森介冑臂
指儼戈鋌遂使鳩張勢翻為撲滅緣節竒因險著事往
賴人傳屬者當藩逆先生適錦旋料其情必血聊復分
相牽懇切迎師表辛勤伐叛箋蠟丸宵入奏露布曉遐
宣自爾蒙

恩重因之嚮用專畫轅開八座黃閣入三遷忠孝培逾
厚流風久慮湮伏陳家世事仰荷

聖衷憐

賜額旌閭里分榮賁豆邊鄉評公可采國史實宜編表
表推名杰煌煌紀大篇時無門比峻家有筆如椽閱歷
干戈畔分明指顧前境真由目擊痛定尚心怕示後言
何苦光前道不愆會須鐫琬琰餘澤永栢棧

雨中過林鹿原梁園寓齋三首

西家井底窺天小東家樓前瞰地寬一雙病眼無處豁
且冒雨出尋蕪端

人言進士不得進

用太白語

自詭書家嬾侍書呼朋日飲坐

無事豈謂有愁煩破除

梁園水通虎坊橋及見老柳垂千條三十年來太搖落
憑欄雨急風蕭蕭

客有笑余乘驢車者賦此畱之

遇酒逢花便出遊蹄間一尺駕輕輶泥塗安穩偕僮僕
灰洞馳驅讓馬牛得免徒行猶有愧更爭先路欲何求
冗官只算騎驢客老向天衢閱八駟

顧俠君庶常招飲晚翠閣次東坡白鶴峯新居
將成夜過翟秀才二首韻

怪底東吳顧文學才名今始透春闈偶移種竹栽花地
如在廉泉讓水間更上一層宜有閣特開四面為看山
滄州酒釀南烹潔每到君家醉飽還

萬卷書多插架仍肯教輕棄短檠燈簾前涼以三更雨
屋裏清于六月冰朝爽不名名晚翠閒官何似似高僧
依稀宣北坊西角鴻爪留泥我亦曾

癸酉夏秋間
余寓居此卷

院長寄馬尾蠅拂子

千條宛轉縮初成，便有風從繞指生。
柄短不勞犀作骨，尾長仍借麈為名。
禪門付法今尤濫，人世清談久見輕。
欲效驅除苦無力，青蠅當暑正營營。

寄祝胡東樵八十壽清溪大司寇屬賦二首

吳羌山色鬱然青，中有元家野史亭。
人指所居為福地，天留此老應文星。
河汾業盛傳三世，夾漈功高在六經。
千尺喬松多美蔭，重看蘭玉繞階庭。

尚書北面舊稱師

司寇公少受業于先生

碩果西吳更有誰著述

久歸三館貯才名曾受

九重知烟波放艇懷清雲風雨連牀記莫釐

庚午秋冬先生在洞

庭東山書局余復追隨

見說精神猶健在杖朝不異杖鄉時

立秋前一日馮卯君同年招遊樵沙道院

抱痾條半載閒居治幽憂故人憐我衰招赴城南遊樵
沙古道觀風氣清瀏瀏東南烟靄交野色翠若浮短塙
俯而瞰下有瓜芋疇入門樹干霄檜栢榆槐楸涼蟬一

聲嘒天地颺以秋微颺自北來大火方西流談諧雜坐
卧几席兼衾裯豆邊既靜嘉旨酒亦思柔二馮乃舊好
留卯君施溥唐斯洵良儔兒孫胥在眼弟姪互勸酬置我
于其間頽然一白頭主人誼良厚欲起每被留試問勢
利交有此摯性不浮雲翳空虛聚散豈自由且為六時
樂用豁窮年愁

題四明萬開遠冰雪集後故友貞一之子也

孟郊歿後十餘載苦語何人更別裁風雅道衰無至性

海山地大得竒才翻瀾涕淚隨聲出徹骨冰霜煉句來
竊喜故人還有子一編浮白為渠開

題亡友吳商志遺像

每過南湖畔傷心是勺園吾猶識前輩君克肖家尊

余少

時侍先大人於禾郡及見尊甫培園先生

彷彿生前影淒涼墓後魂風塵莽

回首耆舊更誰存

立秋後七日偕周桐野宮恕堂錢綱菴張日容
繆湘芷林鹿原顧俠君郭雙村家查浦潤木兩

弟再集樵沙道院用白香山遊開元觀韻

未忍別朋友乃如戀京師循環互主賓荏苒淹歲時自
我為此會四三年於茲中間小聚散比復相追隨心閒
耳目清地曠花卉滋手攜白藤杖笑倚青松枝林風有
餘涼襟袂快一披蓐收鞭白日西走不稍遲顧惟衰病
身乞歸行有期但恐出處跡從今遂參差兄弟幸無遠

是日潤
木治具

羣公莫告疲聊希達士達仰托知音知

題明興安州牧金公與游擊唐通手書後公諱

之純字健之黃州廣濟人

公守興安日明當甲戌年廟堂全局壞山谷一城堅餉
匱雖難給民貧實可憐飛書留片紙辛苦想籌邊

德尹舉第二子同學數人釀錢為湯餅之會席

上口占四首

湯餅筵前賀客俱爭誇老蚌出雙珠大兒已識之無字

箇是徐卿第二雛

長名佛抱今年已上學

又見添丁喜可知衝筵不怕衆賓嗤一錢舊是看囊物

半月前頭助洗兒

兒生亦是壬辰歲恰後而翁六十年便作小同呼也得
可憐花甲一周天

吾年十九初生子子又生孫已就婚

余長孫興祖三年前已就婚雲夢

慙愧比渠多兩世滿頭白髮望曾孫

種竹詩四首次晚香長老韻

竹本淇渭材移根到燕土有如傳衣人微命絲一縷

傳衣

之人命如懸絲五
祖囑付六祖語

買栽當六月正值濯枝雨生意盎然

回定僧為起舞

瘦鞭走空庭無筍可汝口齋厨貧少味待得明年否未

訂歲寒交聊充消夏友青冥長在望苦節須自守

少陵苦竹

詩青冥亦自守

袖銜種竹詩戴笠晨過我秋涼約往看我意大宥可詩
好書復佳展開風滿坐因之悟畫理如對鐵鈎鎖

痴人戴凱之作譜搜方志欲收山谷產畫作樊離寄寓
目何用多三竿兩竿翠竹如頷此語為我發清吹

院長寄惠鮮鹿脯及柘綠魚腊僕以轉餉周桐
野明日枉詩見謝奉答四絕句亦如來詩之數
柳貫紅腮火燎毛

賜腥曾記潤脂膏而今老病如枯腊地主恩同菜把叨
即鹿何須更入林得魚原不費敲針殷勤為謝南來使

已少臨淵見獵心

以上二首
寄院長

水陸卹厨厭飫頻腹腴尾血取鮮新勿嫌薄饋分乾啞
也當貧家作主人

不負漁師與獵師從旁指動為觀頤朝來齒頰回餘味

博得先生四首詩

以上二首奉
答桐野先生

桐野又示七律一章謂前詩不必寄院長再次

來韻

懷珠戴玉互成文

本草鹿戴玉而角
斑魚懷珠而鱗紫

直作詩題遠見分

網出千絲辭密藻射來五色想棚雲雪斑味美秋方足
柘綠名佳古未聞義合及賓吾敢新要傳新句滌辛葷

題杜子綸庶常填詞圖二首

點拍吹簫色色工
梨雲一研雨聲中
風流爾許真堪妬
自琢新詞教小紅

早是人歌緩緩歸
誰搓柳汁染郎衣
杏花羈汗桃花雨
懊恼樊川杜紫微

送楊冠三同年赴任餘杭兼訂徑山之遊二首
秋野雞豚社
春山茶笋鄉
居人力農圃
賢宰好文章
衙鼓聲前卧
爐烟熱後香
城偏迎送少
幽事滿琴堂

暫作修門別
旋期故里逢
君方行綰綬
我欲去攜筇
西

上通雙徑南來控獨松洞天兼福地一一屬花封

道書大滌

山為洞天之一天柱山為福地之一皆在縣治內

為人題舉網圖

翠柳陰中水不波長魚如劍亦如梭
美來大有幸不幸入網無多出網多

題王石谷瀟湘雨意圖卷

平生愛看王老畫筆蹤幻化無端倪
畫石畫水兼畫竹世罕其匹古與齊
不師文與可不學吳仲圭墨君粉本

何處得乃在洞庭南北湘東西似聞瀟湘間陰多晴少

雲淒淒湘君去後湘竹怨留取萬古斑斑啼鷓鴣昏昏

喚作雨山茵

竹雞一名山茵子

滑滑呼成泥九疑剗天不可梯

居人寥落行人迷我昔南遊身未到側聞人說往往猶

含悽今觀所畫殊不爾洒落別自開町畦山舒水緩橋

平堤步有舟航林有蹊籬門茅屋幾家住翠色不受纖

塵翳

平叶

嵐光深淺葉濃淡地勢起伏叢高低展之尋丈

卷盈握疑有煙雨隨提攜乃知善畫取大意信手故自

忘筌蹄適逢好事者持卷乞我題我詩不入竹枝調恍
然如坐篋蓄谷口蒼筤谿

同年劉大山生子名曰阿雷索詩為贈

種樹期開花花開實斯榮實以况男子花以比女嬰憐
君五十餘形影猶單惇前歲甫生女去冬兒復生兒當
未生時厥兆先通靈筮易卦遇震生以雷為名吾觀易
示象震來遠邇驚一索而得男衆口傳轟轟配天為大
壯剛健含利貞配坤則為豫嗶嗶奮陽聲配坎則為解

甲拆敷岑英配巽則為恒人道以久成配艮為小過應
時與偕行配離則為豐日中照乃明配兌為歸妹長少
義交并于益取日進于隨取元亨于頤節飲食于屯驗
滿盈无妄貴无災噬嗑貴慎刑大哉復之義剝極陽始
萌凡茲諸吉祥皆於易理呈皇天不汝薄釋抱來寧馨
特從憂患中用此慰汝情汝可不知足一官何重輕嫁
女雖乏財教兒頗有經祝兒日千里躡步陵公卿他年
聽雛鳳或比老鳳清

商邱宋冢宰八十壽讌詩

世澤扶陽厚重傳，嶽降神中原留碩果。
四海一完人，開府專旌節還。

朝領措紳遺榮辭魏闕

子告就商賓，風月香山社。鶯花洛水濱，懸車時未晚。

賜馬齒長新，坐握高談麈。行扶大雅輪，耆英來汝許。
子妣列荀陳，詩好人難和。心虛士樂親，位兼名並重。
時與物皆春，養鶴千年頂。瞻松百丈身，飛觴同賀歲。
遙祝釣

璜辰

同年盛東田餉青笋徑茶賦謝

楊侯

謂冠三

出宰餘杭縣與訂歸期又涉秋好友忽攜鄉

味到老夫如作徑山遊青尖色嫩初開著綠片香清欲
泛甌一首新詩消得否齋厨無物可相酬

題東田志行詩草後即次見投原韻

同年來詩人莫逆笑相視唱詠日不隔冒雨煩僣使虛
懷荷見推倒篋啟行笥百篇快披閱口諷手弗置爽氣

颯然生高冥偕抗志君才洵敏妙蚤合清殿侍五十甫
成名一官迨需次蹉跎感顏狀磊落示標致往往激壯
心時時吐沈思古音非近賞至味有同嗜六義世誰陳
於君識風刺簿書何足擾野馬過浮吹顧惟醞釀深根
柢皆有自試以易理推十年貞乃字

東田於癸未成
進士今十年矣

題天山坐鎮圖送胡洛思僉事備兵肅州

按圖舊識西陲遠入畫今看使節閒雪點旌旗秋出塞
風傳鼓角夜臨關地連張掖燉煌界人在輕裘緩帶間

一片孤城歸坐鎮不煩三箭定天山

題陳季方詩冊

詩風日以盛詩義日以乖忽於波靡中豁達耳目開之
子非絕俗而難與俗諧所闕學不學豈繫材不材春華
人亦賞秋實人亦采華實所以然根株故有在遙遙古
今宙相望恒相待方謂老眼空快心今獲乃五十有九
章章章非苟作犁然見比興諷諭于焉託此中有餘味
深淺視斟酌子既啜其醇吾言特糟粕

兒建乞假挈累先歸老人行期未定悵然有作
委蛇兒孫去惟留病伴吾未能辭逆旅翻與念長途短
夢江湖濶餘生出處孤殷勤木上座歲晚好相扶

題朱漢源佩劍圖

平生蚤識朱公子要腹便便貯經史無端結束佩吳鉤
繪作戎裘稱壯士高步名場三十秋看人談笑取封侯
知君與世無恩怨賣劍何妨去買牛

東田同年忽戒作詩昨日過我賞菊醉後復破

戒以詩來索和章戲次原韻

聞君戒作詩枯寂徒自窘我思破其戒堅壁恐未允試
以酒誘之徐徐俟激軫半酣不自禁大白果連引妙語
發天機瀾翻吐難忍明朝傳急足一笑啟吾胸黃花開
正繁虛坐前後盡落英尚可賦有味出咀吮

藥酒初成

老人冬來如蟄蟲坯戶况值蜚廉風藥爐新煮藥酒熟
氣觸鼻觀香先通披衣起坐暖寒冽卯飲一呷回春融

氣衰形耗百病作豈有草木能相攻此身略似受霜葉
藉爾暫發衰顏紅

謝院長惠人葭三首

一兩黃參直五千囊空欲致坐無錢朝來忽荷盈觔賜
補貼貧官俸兩年

祖陵地脉禁私創都市居竒價日高翻惜

聖朝多棄物三椴五葉委蓬蒿

四大相纏豈獨風難憑神草證神功七年病要三年艾

還在醫王藥籠中

老人夜卧患足冷以錫為壺貯熱湯二三升許
納被窩中資其餘溫可以達旦俗名湯婆子宋
王晦叔有咏脚婆詩黃山谷詩中所云暖足餅
即此也冬來用之甚適戲贈以詩

貧家奉身薄外物罕所需獨宿踰十年布衾溫有餘匡
床劣容足伸縮頗自如冬來忽畏寒始歎氣血枯雖無
重脰疾未免愁攣拘何法能療之範錫成圍模形如大

口盜又若平底盂口大有受理底平無覆虞沸湯貯三

升脫襪加雙趺居然似踵息陽氣回徐徐豈徒活筋骸

漸爾柔肌膚宵卧可達曉晨眠容及晡我欲老是鄉是

鄉勝華胥既非燕玉比

杜詩暖老須燕玉

且與渥朴殊

東坡詩晴窗暖

足來醉醒惟獨覺冷暖寧關渠婆兮古所名聊作爾汝

呼無情亦無想

義出楞嚴經

老婦得老夫

送盛東田出宰興化四首

名士誰如盛孝章可人風味是清狂故應天與佳山水

生長山鄉宦水鄉

盛為杭之臨安人

范老留題剩古苔官情多委簿書堆濯纓亭外馴鷗地

又得詩人管領來

濯纓亭范文正公宰興化時所建公又有南溪馴鷗詩

千里攜家喜可知免教鈎棧走嶽崎他時檢點還朝集

惜少騎驢入蜀詩

東田初掣授四川富順縣後改調興化

二三千頃菰蒲綠六十四陂菡萏紅

縣有八湖六十四蕩五六月間荷花

最花裏尋君知不遠過淮只使半颿風

桐鄉友人至傳長孫興祖舉子及接家信乃生

女也口占解嘲二首

誰把維虺比夢熊，傳訛幾與弄麀同。
笑將鏡鑷投諸地，等被人呼作太翁。

弱女非男却勝無，苦催吾景赴桑榆。
可憐孫又為人父，二十年前膝上雛。

送德尹典試廣東二首

平生三度嶺南遊，此去星軺速置郵。
榮路人皆艷科目，官資爾已壓時流。

詞垣升轉近皆論俸，惟試差開列不尚。依舊制論資，德尹名在第一。

愁寶劍光華掩須信芳蘭氣味幽還恐高鴻在寥廓張
羅數澤詎勝收

七千里外動征輪寒薄重裘雪洗塵疎柳愛飄江上笛
早梅催發驛前春名場後進雖多士詩社前遊頓少人

時藥亭元孝諸人俱下世珍重老兄留眼望蘓家門下要張陳文潛無已

皆子由門下士也

殘冬展假病榻消寒聊當呻吟語無倫次錄存

十六首

卧看星回晷景移流光冉冉與衰期人言宦海藏身易
自笑生涯見事遲夜似小年寒漸信病非一日老方知
惟餘蓴菜思歸興蚤在秋風未起時

憶昨公車待詔來微名忽忝廁鄒枚

主恩不以優俳畜士氣原於教養培身作紅雲長傍日
心如白雪漸成灰依稀一覺遊仙夢初自蓬山絕頂回
茫茫大地託根孤只道煙霄是坦塗短袖曾陪如意舞
長眉難畫入時圖移燈見蠹寧防毒誤筆成蠅肯被汙

竊喜退飛猶有路的應決計莫躊躇

雨露榮枯共一天塵沙聚散幾同年車推却怪蓬猶轉

玉碎何圖瓦幸全螿穴冰封殘雪後鴈程風緊夕陽前

故人珍重留行意

謂揆湯兩院長

回首觚稜自惘然

盡遣兒孫歸故里尚留弟妹伴他鄉囊空預借三年俸

祿入粗供四口糧

隨身止三僕近領俸米六石足支半年矣

舊積詩逋呵凍

了近添酒債典衣償蕭然此外無餘欠領取南窗枕味

長

一榻中安四面虛放朝渾似放參餘篋中棄扇蟲緣網
案上停燈鼠避書過隙光陰隨夢去就衰筋骨向陽舒
重簾可有纖埃到敝帚殘箕罷掃除

膈膊聲中好送寒偶然為客設碁盤後來或者居人上
先處無如占地寬黑白當前饒勝筭高低隨分有爭端
老夫兀兀支頤坐看似分明下手難

科詔加

恩典不常征軺就道輦相望抱經佚老頭多白拾芥羣

兒口半黃慘澹風雲憐入穀冬烘頭腦怕當場退身引

疾猶多愧我昔曾荒陸氏莊

子自丙戌後
試差俱辭免

海內連年喪老成南傷秀水

竹垞先生歿
于己丑秋

北新城

阮亭
先生

于去年
下世

讀書自要師前輩知己誰能託後生此段人情

看爛熟向來士習例相輕笑他江左衣冠族誓墓區區
為角聲

地降天升氣不交羽禽何物尚膠膠霜濃四野鴉爭粒
葉禿千林鵲露巢各有經營寧得已未知辛苦定誰教

息黥補劓勞生事蓋頂終須一把茅

經旬坐穩一蒲團纔閱朝寒又晚寒
蘊火梅欣先臘放避霜菊耐涉冬
看散花菴裏新居士視草臺中舊史官
勿着兩般分別相大千世界本來寬

不畏羣嗤不受憐孤行一意久彌堅
敢誇願大難成佛肯舐丹餘蚤得仙
方朔文章多詭俗放翁家世少高年

劍南詩家世無高年我今六十翁
色經指訣全拋却人壽終非草木延

宜忌拘牽十二三靈苗毒草比粗諳
性存薑桂何妨辣

味到苓連不取甘，好友勸嘗真苦口。
庸醫隔膜漫多談，古方難適今時用。
此理如禪在細叅。

却病竒方乃避崑，遠坊兩板閉蕭條。
室無歌妓何煩遣。

鄰有鄉僧不待招，謂僧山石鼎濤生茶正熟。
銅爐灰陷火。

潛消雞鳴漏盡人，誰覺又聽門前過早朝。

叢書三館校讐忙，訝許閒情付墨莊。
樗本不材良匠棄，屠非絕技善刀藏。
冬菹剩飽園官菜，歲賜刪除博士羊。
轉益從前素餐愧，大庖珍膳日分嘗。

童時了了記觀河六十年忽已過眼暗耳聾知老否
葛涼裘暖奈身何一帆去國談何易萬卷無家累亦多
愛惜精神圖省事明年兼擬謝詩魔

自題癸未以後詩藁四首

七年供奉入乾清三載編摩在武英兩臂病風雙眼暗
枉將實事換虛名

論卷排成手自刪多慙小草落人間迷藏賴有南山霧
莫便輕窺豹一斑

索筆曾經侍

兩宮可憐無過亦無功未應奢望儒林傳或脫名於黨

部中

拙速工遲任客誇等閒吟徧上林花平生怕拾楊劉唾
甘讓西崑號作家

題鄒古愚望日圖小影二首

鄒生真與古為徒人謂生狂自號愚不戀桑榆收晚景
却回巖電向東隅

君如要看博桑日試上鷹窠萬仞巔只合俯身臨碧海

何須仰面望青天

吾鄉鷹窠頂東臨大海
寅卯之交於水底見日

歲杪自嘆二首


短景侵尋白髮前歸心歸夢日相牽人間雀鼠工嗤點
伴食官倉又一年

天生物性故難齊健水東流弱水西不信羶羊能挂角
如今只有觸藩羝

周桐野前輩以隋龍藏寺碑拓本見貽二首

一千二百僧祇劫龍藏今無片瓦遺不有歐陽能集古
空勞佛力護殘碑

翠墨椎來體尚全書家名姓惜無傳唐賢風骨依稀似
得法歐虞褚薛前



敬業堂詩集卷四十